

Minister Sevinger:

“Aki ta caminda cu e desaroyo di San Nicolas ta haya man y pia”



ORANJESTAD – Durante ceremonia di desvelo di borchu pa construcion di e brug nobo riba Spaans Lagoen, Minister di Infraestructura Benny Sevinger a enfatisa loka e proyecto aki ta representa pa pueblonan pariba di brug den termino di desaroyo economico, pero mas importante ainda, desaroyo social.

“Si di berdad nos kier desaroyo pa San Nicolas, aki ta caminda cu e desaroyo ey ta bay haya man y pia. E camin-

da aki ta bay contribui grandemente na desaroyo pariba di brug,” Minister Sevinger a bisa esunnan presente.

Riba e echo cu e proyecto aki tabata un punto di discusion pa añanan largo, e titular di Infraestructura ademas di Desaroyo Teritorial y Integracion, a comenta cu ta masha facil pa comprende si bo wak den e contexto aki:

“Ora cu un hende ta biba na San Nicolas y e tin cu traha na Oranjestad of hotel y e tin cu lanta 4or di marduga pa e traha su pan, hiba su yiunan y laga nan eynan prome cu scol habri pa e yega pia di trabou 7or y bo bisa e persona cu e caminda aki ta bay percura pa e yega na su trabou safe paso autonon no por pasa otro mas y cu e ta bay yega su trabou porta, te hasta 20 minuut mas trempa y yega cas 20 minuut mas trempa, esey ta un tempo cu bo no por pone un prijs riba esey pero kere mi cu e ta bay nifica hopi pe hendenan di pariba di brug.”

E mandatario ta sigur cu un bes e proyecto keda cla, ta



bay mira su frutanan pa cual el a pidi un fuerte aplauso pa Prome Minister Eman y su vision cu a percura pa Green Corridor ta keda realisa bou di e gobernacion aki. Ademas, el a felicita tur esunnan envolvi paso cada persona su aportacion ta muestra cu

nos kier un miho futuro pa Aruba.

Minister Sevinger a confirma su confianza den Grupo Odinsa cu ta bay converti e proyecto aki den un bon trabou y cu nos tur ta orguyoso di dje.

“Laga nos hunto traha hunto. Unda cu por tin reto, na mesa nos ta resolve esaki. Con cu bay bin nos ta den e barco aki hunto y hunto nos ta yega na final den nomber di pueblo y pa e pueblo di Aruba,” asina e mandatario a finalisa bisando. □

Prome Minister Mike Eman:

Green Corridor ta hisa e calidad di bida for di Pos Chikito te San Nicolas



ORANJESTAD – Cu gran satisfaccion Prome Minister Mike Eman a hiba palabra diaranson atardi na e ceremonia di desvelo di borchu pa construcion di e brug nobo riba Spaans Lagoen. E motibo di e satisfaccion ta cu e trabou aki ta forma parti di e proyecto grandi di Green Corridor cu ta bay conoce un fase nobo di avance.

Mas importante ainda, e brug ta bay percura pa un miho fluho di trafico entre Playa y

San Nicolas y vice versa, lagando e brug anterior como un espacio pa core bicicleta y otro movicion fisico, ademas di recreacion pa habitantenan di Balashi, Pos Chikito y bisindario.

E mandatario a cuminsa na reconoce e magnitud di e evento bisando cu “ta un dia sumamente importante pa nos pais y sigur pa e barionan di Pos Chikito, Savaneta, Brasil, San Nicolas, Rooi Master Zeewijk y tur e barionan caminda unda tin un cantidad di ciudadano cu tur dia mester haci uzo di carretera di Playa pa San Nicolas y San Nicolas pa Playa y ta pasa den oranan di mainta y oranan di atardi den un caminda basta congestiona.”

Premier Eman a indica cu su Gobierno a pone como meta no solamente pa alivia e necesidad pa mas vialidad creando un caminda di cuater via cu ta facilita e trafico, pero tambe mehora e calidad di bida di tur esunnan cu ta biba cerca di e caminda den otro aspectonan.



A duna e tarea na arkitekto y ingenieronan pa crea areanan berde cu hopi mata y espacio pa pasatempo social. Di e manera ey, e proyecto aki ta mehora e espacio entre caminda grandi y e casnan na

ambos banda cu sigur ta un contribucion hopi grandi pa e calidad di bida di e ciudadano cu ta biba di Pos Chikito te cu San Nicolas.

Trabounan di construcion di e brug, como tambe resto

di Green Corridor ta bay tuma rond di dos aña. Prome Minister a gradici tur esunnan envolvi den e proyecto pa nan aporte valioso, a desea exito na Grupo Odinsa cu su ehecucion y a felicita pueblo di Aruba cu e progreso aki. □